

05/09/1997

Sukar hapus Aids jika wujud pusat hiburan

KOTA BHARU, Khamis - Usaha pencegahan sindrom Kurang Daya Tahan Penyakit (Aids) tidak akan berjaya mencapai matlamatnya, jika pintu ke arah kemaksiatan seperti pusat hiburan masih tidak ditutup.

Menteri Besar, Datuk Nik Abdul Aziz Nik Mat, berkata kaedah Islam melalui menyeru kepada kebaikan dan mencegah kemungkaran seharusnya menjadi landasan bertindak dalam membendung gejala maksiat sekali gus dapat membantu mengekang apa juga gejala negatif.

Menurutnya, kaedah Islam turut menganjurkan umatnya agar tidak menghampiri perbuatan zina yang dikenal pasti menjadi penyebab Aids.

"Aids bagaimanapun tidak melanda orang yang sudah berkahwin, termasuk mereka yang berkahwin empat (poligami)."

"Sebab itu Islam menggalakkan umatnya berkahwin," katanya merasmikan Seminar Cabaran Aids Dan Dadah Menjelang Tahun 2000 di sini, hari ini.

Hadir sama Dr Ismail Baba yang mewakili Presiden Majlis Aids Malaysia, Datin Paduka Marina Mahathir dan Pengarah Kawalan Penyakit Kementerian Kesihatan, Datuk Dr Abdul Aziz Mahmood.

Nik Abdul Aziz berkata, sifat takwa adalah perisai paling ampuh dalam membina kekuatan umat untuk menghindari perkara buruk termasuk Aids.

"Oleh itu, apa juga strategi bagi menangani masalah Aids mesti mengambil kira aspek pembinaan ketakwaan manusia," katanya.

Beliau turut memuji usaha Marina yang bergiat cergas dalam pembanterasannya Aids.

"Jika di Barat, mendiang Puteri Diana terkenal dengan perjuangannya untuk menghapuskan periuk api, di Malaysia kita pun tidak kurang dengan pembabitan Marina (dalam perjuangan membanteras Aids)," katanya.

Majlis Aids Malaysia yang dipimpin Marina adalah pertubuhan bukan kerajaan (NGO) yang bergiat cergas membantu menangani masalah dan gejala Aids/HIV serta mendapat sokongan penuh kerajaan menerusi sejumlah peruntukan dana yang besar.

(END)